

01

清商曲辞。月节折杨柳歌十三首。三月诗。

汎舟临曲池，仰头看春花。

杜鹃纬林啼。折杨柳。

双下俱徘徊，我与欢共取。

02

三月三日诗

王讚

招摇启运，寒暑代新。

亶亶不舍，如彼行云。

猗猗季月，穆穆和春。

皇储降止，宴及嘉宾。

嘉宾伊何，具惟姻族。

如彼葛藟，衍于樛木。

郁郁近侍，岩岩台狱。

庶寮鳞次，以崇天禄。

如彼昆山，列此琚玉。

巍巍天阶，亦降列宿。

右载元首，左光储副。

大祚无穷，天地为寿。

03

三月三日洛水作诗

潘尼

晷运无穷已，时逝焉可追。
斗酒足为欢，临川胡独悲。
暮春春服成，百草敷英蕤。
聊为三日游，方驾结龙旗。
廊庙多豪俊，都邑有艳姿。
朱轩荫兰皋，翠幕映洛湄。
临岸濯素手，涉水褰轻衣。
沈钩出比目，举弋落双飞。
羽觞乘波进，素管随流归。

04

三月三日侍宴西池诗
谢灵运

详观记牒。鸿荒莫传。

降及云鸟。日圣则天。

虞承唐命。周袭商艰。

江之永矣。皇心惟眷。

矧乃暮春。时物芳衍。

滥觞逶迤。周流兰殿。

礼备朝容。乐阙夕宴。

05

三日诗

鲍照

气暄动思心，柳青起春怀。
时艳怜花药，服净悦登台。
提觞野中饮，爱心烟未开。
露色染春草，泉源洁冰苔。
泥泥濡露条，裊裊承风栽。
鳧雏掇苦芥，黄鸟衔樱梅。
解衿欣景预，临流竞覆杯。
美人竟何在，浮心空自摧。

06

春庭晚望诗 萧悫

春庭聊纵望，楼台自相隐。
窗梅落晚花，池竹开初筍。
泉鸣知水急，云来觉山近。
不愁花不飞，到畏花飞尽。

07

三日华林园公宴诗 邢邵

回銮自乐野，弭盖属瑶池。
五丞接光景，七友树风仪。
芳春时欲遽，览物惜将移。

新萍已冒沼，馀花尚满枝。
草滋径芜没，林长山蔽亏。
芳筵罗玉俎，激水漾金卮。
歌声断以续，舞袖合还离。

08

山庭春日诗
江总

洗沐惟五日。栖迟在一丘。
古植横近涧。危石耸前洲。
岸绿开河柳。池红照海榴。
野花宁待晦。山虫讵识秋。
人生复能几。夜烛非长游。

09

晚春诗
杨广

洛阳春稍晚，四望满春晖。
杨叶行将暗，桃花落未稀。
窥檐燕争入，穿林鸟乱飞。
唯当关塞者，溽露方沾衣。

10

牡丹
薛涛

去年零落暮春时，泪湿红笺怨别离。
常恐便同巫峡散，因何重有武陵期。
传情每向馨香得，不语还应彼此知。
只欲栏边安枕席，夜深闲共说相思。

11

春夜
王安石

金炉香烬漏声残，
翦翦轻风阵阵寒。
春色恼人眠不得，
月移花影上栏干。